

楊茜堯與老公羅子溢最近被傳搬入「帝王屋」，因風水好可旺老公做視帝！楊茜堯昨日出席劇集宣傳活動時否認傳聞，強調搬屋只為了方便小朋友上學。至於林夏薇忙拍劇及做生意，故與老公仍未有計劃生小朋友。

否認住「帝王屋」旺老公做視帝

楊茜堯着重方便 為子女搬寶



楊茜堯、林夏薇（薇薇）、王浩信與楊明等昨日出席慶劇《黑色月光》宣傳活動，男主角王浩信難得現身，但活動後要趕往電台錄節目，未有受訪便離開。對於劇集快將結局，楊茜堯笑言感到開心：「呢套劇收穫好多，有好多回響同多咗工作。」問到會否學黎耀祥一年只拍一劇？她說：「一年一劇好OK，因為我要好多時間照顧小朋友，有合適劇本都想拍，但要湊小朋友返學，我都好頭痛。（交畀老公湊？）佢都要開工。」

她笑言將小朋友交給好友楊明照顧，楊明說：「我一年唔止一套劇，我一年十套劇，我要搵食。」楊茜堯笑言：「你可以乘機湊小朋友，為將來做父母取經。」楊明笑言：「你叫Lisa（女友莊思明）取經，我問子溢取經點Hea太太。」問到兩人會否再合作？楊茜堯取笑楊明：「佢一年拍十套劇唔知有冇時間，我要打畀Lisa問，佢係你女友定老婆？」楊明說：「遲啲話你知。」楊茜堯追問：「你結咗婚未？」楊明沒好氣說：「你手指拗出唔拗入！」

近日有傳楊茜堯與老公為風水而搬屋，她表示：「太誇張喇！我哋搬咗年幾，話我哋住帝王屋，太睇得起我哋，亦太睇低冇錢人。我哋搬屋主要係方便小朋友返學，同埋最緊要入到間屋覺得舒服，同地段合適，冇睇風水呢啲嘢。」提到王浩信少在香港宣傳劇集，她說：「佢啱啱有新公司，佢都忙，佢負責嚟內地宣傳，我哋就嚟香港宣傳。」

林夏薇冇時間生B

至於薇薇於劇中的衣着打扮成為網民熱話，她坦言沒想過憑角色而被大家留意打扮及自家鑽飾品牌：「我個實體店下月開張，內地同海外加盟店就傾緊。」結婚多年的她被問何時生B？她坦言要兼顧拍劇及做生意，還要照顧家中狗狗，難以分身：「我嘅新鑽飾品牌就係BB，依家做好眼前嘅事。（同老公有共識？）我哋冇任何計劃，總之依家宣傳完劇集就做舖頭開張，再忙加盟店。」問到有冇想過雪卵？她坦言：「冇特別諗。」



■王浩信與林夏薇多得劇集帶挈，都多了工作。

■楊明與楊茜堯同期訓練班出身，老友鬼鬼。

去茶餐廳學沖奶茶 戴耀明冇打算離巢



薛家燕、陳庭欣、冼靖峰、戴耀明、譚輝智和應屆港姐冠軍倪樂琳等，昨日出席《歡樂滿東華2024》記者會。戴耀明預告將與魯振順、王俊棠在節目合唱，提到他最近被拍得在黃大仙的茶餐廳做侍應，戴耀明指無綫很關心他，有送上慰問。他明白做演員未必能做一世，故決定到茶餐廳學一門手藝，已學識沖奶茶和咖啡。

戴耀明續稱：「未去到冇飯開，不過有陣時演員會經歷幾個月冇工開，因為角色未必啱，所以我哋習慣咗有陣好忙，有陣又會好得閒。（公司有冇畀機會你？）有，好多監製都陪住我成長，有咩角色啱都會直接搵我，好照顧我。」他坦言距離完約還有一段時間，加上有底薪，暫時不打算離巢：「因為其實TVB好寬鬆，有好多自由，唔會干涉我接工作，只要我唔破壞公司形象就得，呢個都係我咁多年仲同公司Keep住關係嘅原因。」



■戴耀明強調經濟沒有問題。

阮浩棕俾陳家樂電暈

陳曉華、阮浩棕與羅毓儀等前晚錄影《大師兄又到聖誕感謝祭》，順道宣傳劇集《異空感應》。陳曉華笑言：「依家睇《異》劇睇番兩年前嘅自己，好似睇緊畢業冊，覺得當時嘅我好唔同，如果依家演會有唔同感覺。」對於不少觀眾讚阮浩棕靚仔，他謙稱：「陳家樂靚仔啲，佢靚到似藝術品。我覺得自己依家成熟咗，記得拍嗰陣我覺得家樂好靚仔，會偷望佢，所以依家大家明白劇入面嘅我望家樂嘅曖昧眼神，真係有觸電感覺。」



■陳曉華與阮浩棕於新劇有感情線。

吉吉落力綵排



吉吉挑戰打大油罐

《周吉佩第三人生演唱會》將於本周六在麥花臣場館舉行，周吉佩連日來在Band房落力綵排。他透露屆時在台上彈結他的時間會很多：「平時我嘅形象比較斯文，今次想有更加Rock嘅元素，而且我以前都有夾band，其中有一part係重新演繹一啲大家耳熟能詳嘅樂隊經典歌，呢啲都係我想同大家分享我對Rock嘅喜愛。」吉吉續稱：「我會敲打大油罐，係我從未試過，真係挑戰自己，所以呢一part唔多唔少有壓力。」